

Nuummi Imarsiornermik Ilinniarfimmut ininik attartuinnarani, Namminersorlutik Oqartussat tassunga illussamik sanatitsigunik, piginnittuugunillu siunissamut ungasinnerusumut naleqqunnerussanersoq pillugu nassuiaasiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Attartuinnarnermut nallersuullugu piginnittuunermi aningaasatigut, allaffissornikkullu kingunissaanik nassuiaat misissueqqissaarnertaqassaaq.
Inatsisartunut ilaasortamit Bo Martinsenimit, Demokratit, saqqummiunneqartoq

pillugu

siunnersuutip aappassaaneerpeqarneranut

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap

ISUMALIUTISSIISUTAA

Ataatsimiititaliap suliarinninnermini inuttarai:

Inatsisartunut ilaasortaq Nivi Heilmann Efraimsen, Inuit Ataqtigiit, siulittaasoq
Inatsisartunut ilaasortaq Isak Johannessen, Naleraq, siulittaasup tullia
Inatsisartunut ilaasortaq Margrethe Thårup Andersen, Demokratit
Inatsisartunut ilaasortaq Karen-Marie Kyed Frederiksen, Demokratit
Inatsisartunut ilaasortaq Nivi Rosing, Inuit Ataqtigiit

UPA2026-mi 26. maj 2026-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Siunnersuummi siunertaavoq Naalakkersuisut nassuiaasiornissaannik peqquneqarnissaat, nassuiaammi Nuummi Imarsiornermik Ilinniarfimmi illunik nammineq pigisaqalernissamut aammalu illunik attartoqqiinnarnerup aningaasatigut allaffissornikkullu kingunissai qulaajarneqassapput.

Siunnersuuteqartup nassuiaammi kissaatigivaa erseqqissarneqarnissaa siunissaq ungasinnerusooq eqqarsaatigalugu tulluarnerussannginnerooq Namminersorlutik Oqartussat Nuummi Imarsiornermik Ilinniarfik pillugu attartuinnaratik nammineq illunik sanaartorunik pigisaqalerlutillu.

Siunnersuutip Inatsisartunit siullermeerneqarnera

Ilinniartitaanerit ullutsinnut naleqquttunik illutaqarnissaannik qulakkeerinninnissap pingaaruteqarnera annertuumik isumaqatigineqarpoq, taamatuttaarlu attartornani illutat nammineq piginissaat naapertuunnerpaajusoq nalinginnaasumik isumaqatigineqarluni. Pisortat aningaasaataasa illersorneqarsinnaasumik atorneqarnissaasa qulakkeerneqarnissaa siunertaralugu qulaajaanissaq pingaaruteqartoq oqaatigineqarpoq. Tamatumalu peqatigisaanik apeqquserneqarpoq qulaajaanermut sooq 500.000 kr.-inik atuisoqassanersoq.

Aalisarneq, umiartorneq imarsiornermillu inuussutissarsiuteqarneq inuussutissarsiutaannaanngitsut oqaatigineqarpoq – tassami ilaqutariippassuarnut, nunaqarfinnut, illoqarfinnut nunallu aningaasaqarnerata ilarujussuanut tunngaviupput. Kiisalu illutat pioreersut atorluarneqarnissaat aammalu ilinniarfiit allat illutanik attartorneq eqqarsaatigalugu atugaasa qulaajarneqarnissaat soqutigineqarpoq.

Immikkoortup siullermeerneqarneranut atatillugu Siumut allannguutissatut siunnersuut imaattoq saqqummiuppaat:

“Nuummi Imarsiornermik Ilinniarfimmu aammalumi illunik allanik attartornerit tamakkiissut ilanngullugit ininik attartuinnarit allanngortinneqassasut, taamaasilluni Namminersorlutik Oqartussat nammineq illuuteqalissasut kiisalu illuutitit pioreersut atorluarneqarnissaat ilanngullugu imarsiornermik ilinniarfiup inerisaqqinnissaa ilinniarfiillu allat ilanngullugit suliarineqassasoq. Taannalu siunissamut ungasinnerusumut naleqqunnerussanersoq pillugu nassuiaasiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Attartuinnarnermut nallersuullugu piginnittuunermi aningaasatigut, allaffissornikkullu, aammalu ilinniartitaanikkut kingunissaanik nassuiaat misissueqqissaarnertaqassaaq. Misissueqqissaarnermi ilinniarfiit avataaniit aningaasaliisoqarsinnaanera imaluunniit qanoq aningaasalersorneqarnissaa ilanngunneqassaaq. Misissuinerup inerinera Inatsisartunut saqqummiunneqassaaq UPA 2027-imi”.

Demokraatit, Inuit Ataqatigiit aamma Atassut siunnersuummut isumaqataapput, siunnersuullu ataatsimiititaliamut suliarineqartussanngorlugu innersuullugu. Siumut allannguutissatut siunnersuummik saqqummiussivoq, siunnersuullu ataatsimiititaliamut suliarineqartussanngorlugu innersuullugu. Tamatuma kinguneratigut siunnersuut Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliamut innersuunneqarpoq.

Naalakkersuisunut allakkatigut apeqqutit

Ataatsimiititaliap siunnersuummik suliarinninneranut atugassanik Ilinniartitaanermut, Kultureqarnermut, Timersornermut Ilageeqarnermullu Naalakkersuisoq apeqqutitut assigiinngitsunut akissuteqaqqullugu ataatsimiititaliamit qinnuteqarfingeqarnikuuvoq. Ataatsimiititaliamit apeqqutit aammalu Ilinniartitaanermut, Kultureqarnermut, Timersornermut Ilageeqarnermullu Naalakkersuisup akissutaasa assilineri isumaliutissiisummut matumunnga ilanngussatut kakkiunneqarput.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffissornikkullu kingunerisassat siunnersuutip tunngavilersuutitaani nassuiaatigineqartassasut Inatsisartut suleriaasianni § 33, imm. 1-imi allassimavoq.

Siunnersuut piviusunngortinneqarpat aningaasaqarnikkut kingunerisassat nalunaarneqarsimasut ataatsimiititaliamit maluginiarneqarpoq, taamaalilluni taakku ukioq naallugu AC-fuldmægtigitut atorfimmuut ataatsimut naapertuunnissaat naatsorsuutigineqarluni, tassa imaappoq 500.000 kr.-inut.

Ataatsimiititaliap siunnersuummut oqaaseqaatai

Ilinniartitiit, tassungalu ilanngullugu Nuummi Imarsiornermik Ilinniartifiup, ullutsinnut naleqquttumik illutatigullu naammattunik atugassaqartinneqarnissaasa qulakkeernissaanut nunatsinni sanaartornermut aningaasartuutit qaffakkiartuinnarnerat aningaasallu killeqarnerat ataatsimiititaliamit isumakuluutigineqarpoq.

Ilinniartitaanermut suliassaqarfimmi sanaartugassanut aningaasanik immikkoortitsisoqarsimanngitsoq aammalu Sisimiuni Saviminilerinermik Ilinniartiffissap nutaap aammalu Ilimmarfiup allilerneqarnissaata aningaasalersorneqarnissaat suli utaqqineqartoq ataatsimiititaliamit oqaatigineqassaaq.

Imarsiornermik Ilinniartifiup illutassanik nutaanik Namminersorlutik Oqartussanit pigineqartunik siunissami qaninnermi sanaartornissap Naalakkersuisunit naatsorsuutigineqannginneranik Naalakkersuisut oqariartuutaat ataatsimiititaliamit tusaatissatut tiguneqarpoq.

Tamatumali peqatigisaanik Nuummi Imarsiornermik Ilinniartiffimmi illutat inillu atuartitsiviit, ilinniartitaanerit imarisaannut naleqqussakkat pisariaqartinneqartutut ataatsimiititaliamit isigineqarput – soorlu aamma ilinniartiffinni allani taamaattoqartoq. Taamaattumillu Nuummi Imarsiornermik Ilinniartiffimmut illutassanik nammineq pigisassanik sanaartornissap Naalakkersuisunit sulissutigineqarnissaa ataatsimiititaliamit naleqqunnerpaatut isigineqarpoq.

Nuummi Imarsiornermik Ilinniarfimmi ilinniartitaanerit imarsiortut piginnaasaqarluartut ilinniartinneqarnerannut peqataaqataapput aammalu imarsiornermik suliaasaqarfimmi kalaallinik sulisussarsiortarnermut nukittorsaataallutik. Tamatumalu peqatigisaanik ataatsimiititaliaq isumaqarpoq ilinniarfiup illutaanik sananissap siuarsarneqarnissaanut aningaasaateqarfiit atorlugit aningaasaliisinnaaneq misissorneqartariaqartoq. Sanaartornerup piffissami qaninnerusumi aningaasalersorneqarnissaanut nunarput aningaasassaqaqqanngilaq. Taamaattumillu sivilisunerusumik utaqqisoqassappat ilinniartitaanerit pitsaassusiannut, imarisaannut pilerigineqarnerannullu pitsaanngitsumik kinguneqarsinnaavoq.

Tamatumalu peqatigisaanik ataatsimiititaliamit Naalakkersuisunut kaammattuutigineqarpoq Nuummi piffinni assigiinngitsuni ininik ilinniartitsiviullutillu pikkorissartitsiviusussanik attartornissap sapinngisamik pinngitsoortinniarneqarnissaa qulakkeeqqullugu, tamatumunngalu taarsiullugu Namminersorlutik Oqartussat illuutaanni init ilinniartitsiviullutillu pikkorissartitsiviusartut pioreersut atorluaqqullugit.

Nassuiaammut Naalakkersuisunit suliareqqullugu siunnersuutikkut peqqussutigineqartumut piunasaqaatit annertunngitsut ataatsimiititaliaq naliliivoq. Ilinniarfiit illutaannik attartornermi aammalu piginnittuunermi aningaasartuutit sanilliunneqarsinnaanerannut nassuiaat pitsaanerusumik tunngavissiissaaq, taamaalillunilu periutsit taakku marluk aningaasatigut kingunerisaannik ilisimasaqarnerulersitsissalluni.

Ataatsimiititaliap inassuteqaatai

- Ataatsimiititaliami amerlanerussutillit, Demokraatineersut aamma Inuit Ataqtigiinneersut, siunnersuut akuerineqartussanngorlugu inassutigaat.

Tamatuma peqatigisaanik ilinniarfiit attartugaannut tamarmiusunut taakkunungalu aningaasartuutitut tamarmiusunut takussutissiamik imaqtumik kingusinnerpaamik UKA2027-mi nassuiaasioqqullugit Naalakkersuisut ataatsimiititaliami amerlanerussuteqartunit Demokraatinit Inuit Ataqtigiinnillu kaammattorneqarput. Piginnittuunermi aningaasaqarnikkut, allaffissornikkut ilinniartitaanikkullu kingunerisassanik sukumiisumik misissuineq tunngavigalugu nassuiaatip imarissavaa ilinniartitaanermut illutanik attartornermut taarsiullugu taakku nammineq sanaartorlugillu pigineqarnissaat ungasinnerusoq isigalugu naapertuunneranik naliliineq.

Ataatsimiititaliap taama oqaaseqaateqarluni isumaliutissiissummilu allassimasutut paasinnilluni siunnersuut aappassaaniigassanngortippaa.

Nivi Heilmann Efraimsen
Siulittaasoq

Isak Johannessen
Siulittaasup tullia

Margrethe Thårup Andersen

Karen-Marie Kyed
Frederiksen

Nivi Rosing